



# e-bilten

OPĆINA TEŠANJ

www.opcina-tesanj.ba

e-mail: fuad.sisic@opcina-tesanj.ba

Petak  
Broj 61

16.12.2011

1. Zbog čega ili koga se cijeli Tešanj ocrni?
2. Predano šest aplikacija
3. Priznanja povodom 10. decembra - Dana grada

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu:

fuad.sisic@opcina-tesanj.ba

Molimo vas da ovaj elektronski bilten prosljedite svim zainteresiranim u našoj općini.

Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću.

Sa zadovoljstvom očekujem vaše komentare, sugestije i primjedbe.

**Molim da ne prinatate ovaj sadržaj. Za svaki nepotrebno odštampan papir mora se bez potrebe oboriti drvo koje raste!**



## Zbog čega ili koga se cijeli Tešanj ocrni?

Građani na gubitku

Informisanje sa područja općine Tešanj već dugo vremena nije izbalansirano. Neki mediji na širem planu su postali prepoznatljivi po senzacionalističkim, problemskim vijestima i temama, pri čemu uređivačka politika zahtjeva "posebnu" priču a ne istinu o događajima. I dok jedni afirmišu našu sredinu s ciljem privlačenja investitora i kreiranja pozitivnog poslovnog ambijenta, u isto vrijeme drugi se trude da ponište te efekte. Pitam se mora li novinar na terenu od problema praviti mnogo veći problem, čak senzaciju kako bi udovoljio svojim poslodavcima?

Poslednji prilozi na FTV BiH o stanju u džematu Piljužići, i priči kako vebabije u Tešnju žele preuzeti džemiju u najvećem tešanjском džematu, nije samo nepotreban i nefer obračun FTV BiH sa Reis ef. Cerićem, odnosno sa Islamskom zajednicom BiH. FTV BiH se tim priložima obračunava i sa građanima općine Tešanj (iako uredno plaćaju tv pretplatu), jer je tim prilogom izmišljena priča kojom bi Tešanj trebao u široj percepciji biti nesigurno mjesto. I to samo nekoliko dana nakon što je općinska vlast putem TVBiH pozvala investitore u Tešanj kao sigurno i pravo mjesto za njihove investicije. Investitori trebaju građanima, trebaju onima koji čekaju nova radna mjesta, ali FTV BiH ih želi otjerati.

Neću komentarisati to što FTV BiH sama sebe demantuje. FTV BiH u svega četiri mjeseca priča veoma različito o istom mjestu, istim ljudima i istim činjenicama. To je njihova sramota, i nije me briga. Ali veoma sam zabrinut kada pravi veliku štetu građanima općine Tešanj, kada kažnjava svoje korisnike usluga – kupce. Nigdje i nikada u cijelom svijetu nije zapamćeno da neko kažnjava svoje kupce. Čak ni u totalitarnim režimima ne postoji takav licemjerman, omalovažavajući odnos. Takvi režimi to rade otvoreno, pa iako je cilj isti, ipak to rade sa više dostojanstva. Samo kod nas je vlast donijela zakon kojim građani moraju plaćati usluge javnih tv servisa, a taj isti javni servis ih za taj dobiveni novac maltretira.

Imao sam više poziva sa strane nakon ovih priloga na FTV BiH. Među njima i neki predstavnici stranih organizacija, ali i potencijalni investitori. Odgovorio sam im: pa zar još neko vjeruje u to šta objavljuje taj javni tv servis? I pozvao sam svakoga ko me je nazvao da dođe u Tešanj, da zajedno prođemo cijelu općinu Tešanj. Garantovao sam da će naići na srdačne ljude, ljude koji su spremni pomoći drugima, ljude koji se nekada zainade da niko nema odgovora, ni zbog čega posebno, onako, ali nikada ne prestaju biti dobri ljudi. Samo da nam ne dovedu sa strane neke loše ljude da bi opravdali svoje vijesti!?



## Predano šest aplikacija

*Karta je kupljena*

Za tri godine smo educirali uposlene, NVO, ojačali institucionalni kapacitet formiranjem TRA - općinske razvojne agencije te profilisali prioritete. Uz početne teškoće i nerazumijevanje unutar same lokalne vlasti, ipak smo danas na TOP listi lokalnih zajednica spremnih da u kratkom roku popune najzastojnije aplikacije, i da se dobije podrška. Očekivali smo brži hod Bosne i Hercegovine na Mapi puta ka EU, ali to se nije dogodilo. To je razlog što se aplikacije zadržavaju samo na izvorima kulturno-historijskog naslijeđa, interkulturalne saradnje, institucionalnog jačanja i edukacije sa relativno manjim iznosima u realizaciji infrastrukturnih projekata. Nemamo pristup strukturalnim fondovima dok BiH ne ispuni određene uvjete i ne postane kandidat. Ali to nije do lokalne zajednice, i Općina Tešanj će do tada postići rutinu u poslovima koji zahtjevaju posebna znanja i vještine, i steći potrebnu prednost.

Općina Tešanj je u posljednja dva mjeseca predala šest projektnih prijedloga na pozive iz programa IPA CBC Adriatic i IPA CBC HR-BiH. Projektni prijedlozi dolaze iz različitih područja i to od razvoja preduzetništva, zaštite okoliša, razvoja jedinstvene turističke ponude i zaštite kulturnog naslijeđa u pograničnom području do energetske efikasnosti. Navedeni projekti su predati sa partnerima iz Italije, Grčke, Slovenije, Crne Gore, Albanije i Crne Gore. Nazivi navedenih projekata su: Castle by Castle; Developing and clustering innovative SMEs in Adriatic region; Energy Efficiency in Adriatic region; Back2History - Bridge Empires' Borders for Common Future / Na granici carstava; IMPROving WASTE Management Capacities - IMPRO.WASTE i; Sustainable use of of energy.

Ukupna vrijednost svih navedenih projekata je cca. 7 miliona EUR, dok je udio Općine Tešanj procijenjen na cca. 800.000 EUR, od čega u slučaju pozitivne ocjene donatora grant iznosio 85% od ukupne vrijednosti projekta.

Koordinator na pripremi projekata je bio Doc.dr. Ismar Alagić, Savjetnik općinskog načelnika za pristup EU-fondovima uz punu uključenost TRA - Agencije za razvoj općine Tešanj.

## Priznanja povodom 10. decembra - Dana grada

*Općinski praznik*

1. **Centar za KiO** - 15 godina od osnivanja i uspješnog rada: dovoljno je reći 120 objavljenih knjiga, 90 izložbi, 10 naučnih i drugih skupova, više od 100 tribina, više od 100 književnih večeri, snažna podrška utemeljenju triju općinskih manifestacija, i ne treba dalje govoriti.
2. **EKO SERVIS** – za doprinos u dostizanju vizije: Tešanj – sredina ekološke svijesti, čistoće i reda: hiljade tona otpada, željeza odavno nema u rijekama i potocima, niti u šumarcima, papir, pvc, razne vrste metala i nemetala. U posljednje vrijeme se industrijska ulja i emulzije





recikliraju u pogonu EKO-SERVISA tako da s ponosom možemo istaći ovu kompaniju koja svojom djelatnošću doprinosi dostizanju eko-ciljeva.

3. **BIOŠAMP**, Šije – za najuspješniju proizvodnju gljiva u Bosni i Hercegovini i upošljavanje: **BIO-ŠAMP doo Šije, Tešanj** obiteljsko je preduzeće sa više od osam godina iskustva u gljivarskoj proizvodnji. Primarna djelatnost su uzgoj i prodaja gljiva, prvenstveno plemenite pečurke (šampinjona). Obzirom na zahtjeve tržišta i potrebe kupaca „Bio-šamp“ doo Šije proširio je svoje proizvodne kapacitete te se danas osim proizvodnje šampinjona bavi uzgojem bukovače i shii-take (ši-taki). Dugogodišnje iskustvo i uspješno rukovođenje neminovno je uvjetovalo da „Bio-šamp“ doo postane vodeći proizvođač gljive na prostoru Bosne i Hercegovine. Razvoj preduzeća prate stručnjaci i znanstvenici iz razvojnih i obrazovnih institucija. Uz stalnu kontrolu procesa proizvodnje, u svim fazama, postignuta je vrhunska kvaliteta, te činjenica da svježom gljivom snadbijevaju trgovačke lance i veće supermarkete u regiji putem vodećih tržišnih centara, potvrda su stručnih dostignuća rukovodećeg tima i preduzeća u cjelini.
4. **IGM „USORA“**, Jelah – za uspješno partnerstvo na planiranju i realizaciji poslovne zone “Glinište”: izrada regulacionog plana, idejnog i izvedbenog projekta u poslovnoj zoni “Glinište” se radilo zajedničkim snagama i sredstvima Općine Tešanj i IGM “Usora” Jelah. Prva faza izgradnje infrastrukture u ovoj zoni je osigurana uz podršku IGM “Usora”. Ovaj projekat će donijeti svakako novu šansu i investicije za cijelu općinu Tešanj, posebno za Jelah, Rosulje i neposredno okruženje na ovoj lokaciji.
5. **Udruženje građana „PČELA“** za uspješnu organizaciju 5. Sajma pčelarstva Tešanj 2011 i razvoj pčelarstva na području općine: uz minimalnu podršku Općine Tešanj ovo udruženje je razvilo već tradicionalni sajam dajući snažnu podršku dostizanju vizije Općine Tešanj – sredina ekološke svijesti, čistoće i reda. Udruženje “PČELA” je i najuspješnije udruženje u ZeDo kantonu u ovoj oblasti.
6. **HANDIKAP International** Sarajevo – za pomoć i podršku deminiranju na prostoru općine Tešanj u 2011. godini: **Handicap International** je međunarodna organizacija specijalizirana u području invaliditeta. Nevladina, nereligiozna, nepolitička i neprofitna, radi zajedno sa ljudima sa invaliditetom, nudeći im pomoć i podršku. Od svog stvaranja, organizacija je postavila programe u oko 60 zemalja, a intervenirala je u mnogim izvanrednim situacijama. Ona ima mrežu od osam nacionalnih udruga (Belgija, Kanada, Francuska, Njemačka, Luksemburg, Švicarska, Velika Britanija, SAD) koji pružaju ljudske i financijske resurse, upravljanje projektima i podizanje svijesti o Han-



dicap International akcije i kampanje. U općini Tešanj su učestvovali u sufinansiranju 2 projekta deminiranja.

7. **Namik Širbegović** – uspješna kupovina i ekonomska obnova lokacije preduzeća Ukus sa pozitivnim efektima za cijelu zajednicu: hrabrom odlukom o kupovini imovine preduzeća “Ukus” u stečaju, Namik Širbegović je za godinu dana od jedne zamrle lokacije napravio jednu od najživopisnijih lokacija na području općine Tešanj, obnavljajući pogone sa novim programima ali i jednu široku ponudu građanstvu. Već danas na ovoj lokaciji je više uposlenih nego što je upošljavao nekada “Ukus”.
8. **Husein Galijašević**, Tešanj – za doprinos zajednici iz reda građana: dovoljno bi bilo reći samo Husein Galijašević i vjerujemo da građani općine Tešanj će kazati SVAKA ČAST. Čovjek koji je godinama davao doprinos u privrednom i društveno-političkom životu općine Tešanj, a sada kada je u penziji i kada je proživio nepravedni sudski postupak, nastavlja sa mnogo energije i punim srcem pomagati privrednike, nevladin sektor, lokalnu upravu na različite načine. I mi kažemo SVAKA ČAST g-dine Galijaševiću!
9. **Izudin Ahmetlić**, Vukovo – za pomoć i podršku lokalnoj zajednici: Izudin Ahmetlić pomaže lokalnoj zajednici na različite načine i u različitim područjima: od ekologije do socijalnog sektora, od ekonomije do zdravstva što kao građanin a i kao vlasnik kompanije HIFA-OIL.
10. **Šefko Elez**, Dobropolje-Mekiš: za uspješno izvođenje radova na obnovi kulturno-historijskog nasljeđa: Općina Tešanj je dobitnik povelje za kulturno-historijsko nasljeđe za 2011. godinu, povelju je dobio i pomoćnik ON-a Suad Huskić a obzirom da mi ne dodjeljujemo povelje ali priznajemo da je istu zaslužio i stalni izvođač radova u ovom području g-din Šefko Elez, odnosno njegova firma, ovim putem želimo mu odati priznanje.
11. **Emina Ajanović**, Tešanj – za uspješno ovođenje javne ustanove “Sportska dvorana”: G-đa Emina Ajanović s krajem ove godine odlazi u zasluženu penziju. U penziju odlazi s dužnosti direktora javne ustanove “Sportska dvorana” koju je vodila kao prava domaćica. A domaćice vode računa o svojoj kući, i Emina je bez bilo kakve sumnje dala primjer svima kako treba raditi javne poslove i obavljati javne dužnosti: odgovorno, posvećeno i dsoljedno.



## Priznanje

### *Uspjeh ovisi o podršci drugih*

Ovim putem zahvaljujem svima koji su mi neposredno, pozivom, mailom ili na drugi način uputili čestitku povodom dodjele priznanja NAJMENADŽER 2011. Priznanjima se kao ljudi uvijek radujemo svi, pa i ja, ali ona nikada ne pripadaju pojedincu, pogotovo ne kada se radi o dužnosti Općinskog načelnika. Hvala svima na saradnji, Općinskom vijeću, pomoćnicima i savjetnicima, administraciji, direktorima i uposlenim u javnim ustanovama i preduzećima, privrednicima, nevladinim organizacijama, građanima i svim medijima koji ne ruše Tešanj.

Hvala lijepa, i hvala svima vama. Uspjeh ovisi o podršci drugih, a priznanja su dekor zbog kojih se nakratko malo ljepše osjećamo.



Općinski načelnik  
Fuad Šišić

